

ՀՀ ԳԱԱ ԱԿԱԴԵՄԻԿՈՍ ՎԼԱԴԻՄԻՐ ԽՈՋԱԲԵԿՅԱՆ՝
ԳԻՏՆԱԿԱՆ, ՄԱՐԴ - ՔԱՂԱՔԱՅԻ

Հունիսի 3-ին՝ կյանքի 83 տարեկան հասակում, կյանքից հեռացավ ականավոր գիտնական, ՀՀ ԳԱԱ ակադեմիկոս Վլադիմիր Եղիշի Խոջաբեկյանը։

Վ. Խոջաբեկյանը ծնվել է 1929 թ. մարտի 2-ին ՀՀ Վարդենիսի շրջանի Խաչաղբյուր գյուղում։ Գերազանցության դիպլոմով ԵՊՀ-ն ավարտելուց հետո անցել է աշխատանքի Հայպետհրատում, իսկ 1960 թ. մինչև մահը աշխատել ՀՀ ԳԱԱ Մ. Քոթանյանի անվ. տնտեսագիտության ինստիտուտում՝ որպես ավագ գիտաշխատող, գիտական քարտուղար, բաժնի վարիչ, փոխտնօրեն, տնօրեն, ապա՝ տնօրենի խորհրդական։



Վ. Ե. Խոջաբեկյանը հեղինակել է ավելի քան 500 գիտական աշխատանքներ, որոնցից մեկ և կես տասնյակը մենագրություններ են։ Դրանք հայերեն, ռուսերեն, անգլերեն, գերմաներեն լույս են տեսել Երևանում, Մոսկվայում, Կիևում, Բեռլինում, Նյու Յորքում, Փարիզում, Աթենքում և այլուր՝ նրան բերելով լայն ճանաչում։

Վ. Խոջաբեկյանի առաջին ուսումնասիրությունները նվիրված են աշխատանքի արտադրողականության տեսական հարցերին, ներարտադրական ռեզերվների բացահայտմանը և գնահատմանը, դրանց դասակարգմանը, արդյունաբերական ձեռնարկությունների ռեզերվների ի հայտ բերելուն և օգտագործմանը, իսկ 1960-ական թվականներից սկսած՝ ժողովրդագրության զարգացման օրինաչափությունների դրսևորման ուղղությունների, միտումների և բնակչության աճի գործոնների դերի բացահայտմանն ու գնահատմանը։ Նրա գրչին են պատկանում այնպիսի մենագրություններ, ինչպիսիք են «Բնակչության ընդլայնված վերարտադրությունը և աշխատանքային ռեսուրսների օգտագործումը 1966–1985 թթ. Հայկական ԽՍՀ-ում», «Աղետ և մտահոգություն» (որում բացահայտվել են երկրաշարժի ժողովրդագրական հետևանքները, դրա ազդեցությունն աղետի գոտում, հատկապես նրա էպիկենտրոնում), «Արցախը փորձության ժամին» (նվիրված է Ադրբեջանում և Լեռնային Ղարաբաղում իրականացվող հայաթափության քաղաքականության մերկացմանը), «Հայաստանի բնակչության վերարտադրությունը և տեղաշարժերը XIX–XX դարերում, XXI դարի շեմին» (նվիրված է ժողովրդագրության, պատմության և ժողովրդական տնտեսության հիմնախնդիրների համապարփակ քննարկմանը։ Այն վերաբերում է բնակչության աճի և տեղաշարժերի, էթնոժողովրդագրա-

կան գործընթացների առանձնահատկությունների և օրինաչափությունների բացահայտմանը) և այլն:

Վ. Խոջաբեկյանն արդյունավետ գիտահետազոտական աշխատանքներ կատարելու համար պարզևատրվել է ՀՀ Մովսես Խորենացու մեղալույ, բազմաթիվ պատվոգրերով: 1999 թ. Ամերիկյան կենսագրական ինստիտուտի կողմից նա արժանացել է «1998 թ. Տարվա մարդ» կոչմանը:

Մեծ է Վ. Խոջաբեկյանի վաստակը նաև բարձրորակ տնտեսագետների, այդ թվում գիտնականների պատրաստման գործում: Մոտ կես դար դասախոսել է հանրապետության բարձրագույն ուսումնական հաստատություններում: Նրա գիտական ղեկավարությամբ թեկնածուական ատենախոսություններ են պաշտպանել բազում ասպիրանտներ ու գիտաշխատողներ:

Երկար տարիներ Վ. Խոջաբեկյանը եղել է ՀՀ ԳԱԱ պատմության և տնտեսագիտության բաժանմունքի ակադեմիկոս-քարտուղարի տեղակալը, բաժանմունքի բյուրոյի անդամ, ՀՀ ԳԱԱ տնտեսագիտության ինստիտուտի գիտական, Երևանի պետական տնտեսագիտական ինստիտուտի ատենախոսության պաշտպանության մասնագիտական խորհուրդների նախագահ:

Վ. Խոջաբեկյանն իր ողջ գործունեության ընթացքում աչքի է ընկել սկզբունքայնությամբ, գիտական բարեխղճությամբ, աշխատասիրությամբ ու պարտաճանաչությամբ:

Տաղանդավոր գիտնականի, գիտության կազմակերպչի, հայ ժողովրդի արժանավոր զավակի՝ Վլադիմիր Խոջաբեկյանի պայծառ կերպարը վառ կմնա նրան ճանաչողների, հարազատների, բարեկամների հիշողության մեջ:

ՀՀ ԳԱԱ նախագահություն
ՀՀ ԳԱԱ հայագիտության և հասարակական
գիտությունների բաժանմունք
ՀՀ ԳԱԱ Մ. Քոթանյանի անվան տնտեսագիտության ինստիտուտ